

12. gr.

174

Brot gegn samþykkingum þessum varða sektum frá 10—200 króna, og er veiði eða andvirði hennar upptækt og renni í félagssjóð. 16. okt.

Samþykkt þessi staðfestist hér með samkvæmt lögum nr. 61 23. júní 1932 til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Atvinnu- og samgöngumálaráðuneytið, 16. október 1941.

Hermann Jónasson.

Gunnl. E. Briem.

ARÐSKRÁ

175

16. okt.

fyrir Veiðifélag Reykjakvísar.

Nöfn jarða: *	Arðeiningar:	Nöfn jarða:	Arðeiningar:
Þverá	40	Geitafell	100
Holtakot	75	Kasthvammur	40
Stóru-Reykir	70	Árhvammur	40
Litlu-Reykir	60	Presthvammur	30
Hveravellir	60	Klömbur	75
Laufahlið	30	Brekka	40
Brekknakot	45	Yztihvammur	60
Klambrasel	100	Nes	80
Langavatn	80	Árbót	75

Arðskrá þessi staðfestist hér með samkvæmt lögum nr. 61 23. júní 1932 til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Atvinnu- og samgöngumálaráðuneytið, 16. október 1941.

Hermann Jónasson.

Gunnl. E. Briem.

REGLUGERÐ

176

17. okt.

um skipun slökkviliðs og brunamála í Seyðisfjarðarkaupstað.

I. KAFLI

Um skipun brunamálanefndar og verksvið hennar.

1. gr.

Brunamálanefnd er skipuð 3 bæjarfulltrúum og slökkviliðsstjóra. Auk þess á bæjarstjóri sæti í nefndinni og er hann formaður hennar. Um kosningu nefndarinnar fer með sama hætti og annarra fastra nefnda bæjarstjórnar, og skal hún kosin til sama tíma.

Brunamálanefnd hefur á hendi, undir umsjón bæjarstjórnar, stjórn brunamála kaupstaðarins, að svo miklu leyti, sem starfið heyrir ekki beinlínis undir slökkviliðsstjóra eða lögreglustjóra. Hún skal hafa eftirlit með því, að ákvæðum brunamálalaganna og reglugerðar þessarar sé í öllu fram fylgt.

176

17. okt.

II. KAFLI

Hver slökkvitæki kaupstaðurinn skuli eiga og viðhald þeirra.

2. gr.

Seyðisfjarðarkaupstað er skylt, auk slökkvistöðvar, að eiga í notfæru ástandi, að minnsta kosti þessi slökkvitæki og áhöld: 1 völdælu, 450 metra slöngur með tilheyrandi tengslum og stútum, 1 björgunarstiga, 1 áhald- og slönguvagn, 1 eldvarnarægl, 2 reykgímur, 2 krókstjaka, 26. hjálma, 8 regn- eða hlífðarkápur ásamt öðrum smærri áhöldum. Áhöld þessi skulu geymd í slökkvistöðinni og skal þeim á kostnað bæjarsjóðs haldið vel við, svo að þau séu ávallt í notfæru standi.

Ef brunamálanefnd þykir ástæða til að auka eða fullkomna slökkvitækin, skal hún leggja til við bæjarstjórn að svo verði gert.

Lykill að slökkvistöðinni skal vera í vörzlu slökkviliðsstjóra, varaslökkviliðsstjóra og svo margra úr slökkviliðinu, sem slökkviliðsstjóri telur nægilegt. Slökkvistöðinni skal haldið vel við á kostnað bæjarsjóðs.

3. gr.

Slökkviliðsstjóri hefur, undir umsjón brunamálanefndar, eftirlit með tækjunum og skal honum heimilt, að fengnu samþykki brunamálanefndar, að ráða sérstakan mann til gæzlu völdælunnar og annarra tækja. Þóknun til þessa gæzlumanns tækjanna greiðist úr bæjarsjóði, enda beri hann ábyrgð á því, að tækin séu fyrir hendi og að þeim sé vel við haldið. Við árslok hver sendir slökkviliðsstjóri brunamálanefnd skrá yfir slökkvitæki þau, sem til eru, og skal þess jafnframt getið, hver slökkvitæki hafi verið keypt á árinu og hver hafi gengið úr sér.

III. KAFLI

Skylda borgaranna til þess að gegna slökkviliðsstörfum og skipun slökkviliðs.

4. gr.

Slökkviliðsstjóri, og í forföllum hans varaslökkviliðsstjóri, er yfirmaður og stjórnandi alls slökkviliðsins. Auglýsa skal í janúarmánuði ár hvert í auglýsingakassa kaupstaðarins, hver sé slökkviliðsstjóri, hvar hann býr, hverjir séu honum næstir yfirmanna í slökkviliðinu og hvernig tilkynna skuli eldsvoða. Slökkviliðsstjóri og varaslökkviliðsstjóri mega ekki vera fjarverandi báðir í senn, nema sérstaklega standi á, og þó því aðeins, að bæjarstjóri samþykki, og að maður sé settur í þeirra stað.

5. gr.

Allir verkfærir karlmenn, 20—60 ára að aldri, sem heimilisfastir eru í kaupstaðnum, að undanskyldum þeim, sem með læknisvottorði sanna, að þeir fyrir heilsubilun séu ekki færir til vinnu, eru skyldir til þjónustu í slökkviliðinu. Frá þessu ákvæði eru þó lækni- og sóknarprestur undanskildir.

6. gr.

Í slökkviliði kaupstaðarins skulu að minnsta kosti vera fastráðnir þessir menn: Slökkviliðsstjóri, varaslökkviliðsstjóri, 24 liðsmenn og 2 brunaboðar.

7. gr.

Bæjarstjórn skipar slökkviliðsstjóra og varaslökkviliðsstjóra til fjöggra ára í senn, eftir tillögum brunamálanefndar, en brunamálanefnd skipar aðra starfsmenn slökkviliðsins, eftir tillögum slökkviliðsstjóra. Slökkviliðsstjóri getur skipt um liðsmenn slökkviliðsins án nokkurs fyrirvara ef hann finnur ástæðu til, og látið skipa aðra í

þeirra stað til bráðabirgða. Allir liðsmenn í slökkviliðinu eru skyldir til að tilkynna 176
slökkviliðsstjóra með viku fyrirvara, ef þeir af gildum ástæðum geta ekki sinnt starfi 17. okt.
sínu í slökkviliðinu.

Flokksstjórar skulu skyldir til að tilkynna slökkviliðsstjóra, ef þeir fara burt úr kaupstaðnum daglangt, og liggur sekt við, ef út af er brugðið.

8. gr.

Slökkviliðsstjóri og varaslökkviliðsstjóri hafa þóknun fyrir starfa sinn, eftir ákvörðun bæjarstjórnar. Aðrir liðsmenn slökkviliðsins fá greiðslu fyrir hverja klukkustund, sem þeir vinna í þjónustu þess við æfingar, við að slökkva eld eða við varðstöðu, eftir gjaldskrá, sem bæjarstjórn setur í janúar ár hvert.

Þeir, sem skemma fót sín í þágu slökkviliðsins, eiga rétt á því að fá skemmdirnar endurgoldnar úr bæjarsjóði, eftir mati eða samningi.

9. gr.

Slökkviliðsstjóri stjórnar æfingum slökkviliðsins og ber ábyrgð á því, að ávallt séu nógu margir í slökkviliðinu og að það sé vel æft. Þegar eldsvoða ber að höndum, ákveður hann, hvernig slökkviliðinu skuli fyrir komið, og allt hvað gera skuli til þess, að slökkva eldinn og varna útbreiðslu hans. Þó má hann ekki rífa niður hús til varnar útbreiðslu elds, nema samþykki lögreglustjóra komi til, eða þess, sem fer með umboð hans við eldsvoðann. Ef slökkviliðsstjóri er forfallaður, gengur varaslökkviliðsstjóri í hans stað, og sé hann heldur ekki viðstaddur, þá hefur yfirstjórn á hendi sá af liðsmönnum, sem slökkviliðsstjóri hefur fyrir fram ákveðið til þess.

10. gr.

Sérhver slökkviliðsmaður er, að viðlagðri sekt, skyldur til að mæta til æfinga og til þess að slökkva eld, þegar hann er til þess kallaður, hvar sem er innan lögsagnarumdæmis kaupstaðarins, og hlýða þá í öllu því, sem yfirmaður hans skipar honum. Enginn má heldur án leyfis yfirmanna, yfirgefa eldsvoða áður en slökkt er, né slökkviæfingu áður en henni er lokið.

11. gr.

Lögreglustjóri er yfirmaður lögreglusveitar þeirrar, sem viðhalda skal góðri reglu við eldsvoða og slökkviæfingar. Auk hans eru í lögreglusveitinni lögregluþjónar kaupstaðarins og enn fremur þeir menn, sem lögreglustjóri kveður til úr flokki þeirra, sem skyldir eru til þess að vera í slökkviliðinu. Lögreglustjóri ákveður skipulag lögreglusveitarinnar og starfsvið hvers einstaks í henni. Skylt er lögreglustjóra að halda uppi góðri reglu við eldsvoða og æfingar, sjá slökkviliðsmönnum fyrir greiðum gangi og annast um, að engir óviðkomandi gangi of nærri húsi því, sem brennur eða flytji þaðan neitt burt, nema með leyfi slökkviliðsstjóra. Lögreglusveitin sér enn fremur um hjargaða muni og annast brottflutning og aðhjúkrun þeirra, sem verða kynnu fyrir slysum, visar burtu og tekur fasta þá, sem sekir verða um brot og kærir þá.

Umferð má banna um götur, þar sem þess er þörf.

12. gr.

Það er skylda hvers eins, sem viðstaddur er eldsvoða, hvort sem hann er í slökkviliðinu eða ekki, að láta í té alla þá aðstoð, sem hann getur, ef slökkviliðsstjóri krefst þess, og hlýða í öllu fyrirskipunum hans.

176

17. okt.

IV. KAFLI

Um vatnstöku.

13. gr.

Heimilt er að taka vatn til að slökkva eld hvar sem slökkviliðsstjóri telur hagkvæmast að ná því.

Skylt er sérhverjum húseiganda að leyfa, að vatn sé tekið úr vatnshönum í húsi hans til að slökkva með eld, gegn fullu endurgjaldi úr bæjarsjóði fyrir skemmdir á húsi og öðrum fjármunum, sem af því hlýzt, og má enginn, sem í húsinu er, leggja tálmanir fyrir að slökkviliðið hafi greiðan gang að vatnshönum í húsinu. Meðan verið er að slökkva, eru bæjarbúar skyldir að takmarka vatnsnotkun sína svo, að þeir noti vatn aðeins til nauðsynlegustu heimilisþarfa.

V. KAFLI

Um skoðun eldfæra og reykháfa.

14. gr.

Reykháfa alla skal hreinsa a. m. k. tvisvar sinnum á ári.

Brunamálanefnd skal ráða mann, sem hafi á hendi eftirlit og skoðun eldfæra og reykháfa í kaupstaðnum. Skal hann á ári hverju skoða eldfæri og reykháfa í hverju húsi kaupstaðarins og líta eftir, að reykháfar hafi verið tilhlýðilega hreinsaðir, svo og að aðgæta, hvort eldfim efni séu geymd, sem vera ber, samkvæmt lögum um brunamál nr. 85 frá 28. nóv. 1907. Skoðunarmaður skal gera skýrslu um skoðunina og afhenda hana brunamálanefnd.

Komi það í ljós við skoðunina, að einhverju sé ábótavant í þessu efni, skal það tafarlaust bætt, ef hægt er. Ella má veita húseiganda stuttan frest til að lagfæra gallana og ný skoðun fara fram að þeim fresti liðnum. Komi þá í ljós við hina síðari skoðun, að enn sé ekki búið að bæta úr því, sem að var fundið, skal tafarlaust kæra hlutaðeiganda fyrir lögreglustjóra, sem kemur fram ábyrgð á hendur þeim brotlega og lætur á hans kostnað færa í lag það, sem lagfæra þarf.

VI. KAFLI

Um brunaboðun.

15. gr.

Það er skylda hvers eins, sem verður var við eldsvoða, að tilkynna það slökkviliðinu þegar í stað.

Að öðru leyti skal, þar til önnur skipun verður gerð, slökkviliðið kallað saman með því að hefja brunakall um kaupstaðinn með brunalúðri.

VII. KAFLI

Ýmsar almennar varúðarreglur til að fyrirbyggja eldsvoða.

16. gr.

Á götum, stakkstæðum, torgum eða almannafæri, eða milli húsa eða í görðum, má ekki setja lausar eldstór eða hlóðir, nema leyfi sé veitt til þess af slökkviliðsstjóra, og ákveður hann þá, hvernig eldstæðið skuli búið út, og hverra varúðarreglna skuli gætt.

17. gr.

176

17. okt.

Eldivið, steinkol, mó og annað eldsneyti, má ekki láta liggja fyrir utan hús, nema með samþykki brunamálanefndar, og veitir hún því aðeins samþykki til þess, að ekki geti stafað af því eldshætta að marki.

Birgðir af steinolíu, benzíni og öðrum eldfimum vökvum skulu geymdar í húsum inni eða mannheldum girðingum, og hvergi nema þar, sem bæjarstjórn samþykkir. Um undanþágu frá þessu fer samkv. lögum um brunamál.

Hafi einhver sett birgðir af slíkum eldfimum vökvum á bersvæði eða annars staðar í óleyfi bæjarstjórnar, má lögreglustjóri láta flytja þær burtu á kostnað eigna.

18. gr.

Þar, sem geymdar eru birgðir af steinolíu, terpintínu, benzíni eða áþekktum eldfimum vökvum, setur brunamálanefnd, í samráði við bæjarstjórn, þær varúðarreglur um meðferð elds, sem hún telur fulltryggar.

19. gr.

Bannað er að halda opinberar jólatrésskemmtanir, nema leyfi lögreglustjóra komi til. Ekki má halda þær í öðrum húsum en þeim, sem teljast vel útbúin til þess, meðal annars um tilhögun dyra og önnur skilyrði til útgöngu.

VIII. KAFLI

Um slökkviliðið.

20. gr.

Fastir starfsmenn slökkviliðsins skipast þannig niður:

Björgunarflokkur	8 menn
Vatnsslönguflokkur	8 —
Dæluflokkur	4 —
Húsrifs- og stigaflokkur	4 —
Brunaboðar	2 —

Slökkviliðsstjóri skiptir niður í flokka og skipar flokksstjóra eftir þörfum. Hann skal og árlega semja skrá yfir alla, sem skyldir eru að mæta samkvæmt 5. og 6. gr., og skal hverjum einum tilkynna, í hvaða flokki hann skuli vera. Að lokinni æfingu eða eldsvoða skal merkja á skránni við alla þá, sem hafa mætt.

21. gr.

- Björgunarflokkur. Tveimur ákveðnum mönnum úr björgunarflokknum er skylt að mæta þegar eldsvoða ber að höndum, á brunastaðnum, svo fljótt, sem unnt er. Hinir sjá um flutning stiga og annarra björgunartækja á brunastaðinn. Fyrsta verk björgunarflokksins skál vera að bjarga fólki, þá lifandi skepnum og síðan öllum dauðum munum, hverju nafni sem nefnast, undantekningarlaust. Allt, sem hann bjargar, skal hann fara vel með. Enga björgun má hann framkvæma að undanskildu fólki og skepnum, nema eftir fyrirskipun slökkviliðsstjóra eða annars, sem gengur í hans stað. Slökkviliðsstjóri skipar úr flokki þessum flokksstjóra, sem hann getur snúið sér til með skipanir sínar, sem og til hinna annarra flokksstjóra, sem skipaðir kunna að vera.
- Húsrifsflokkur skal hafa á hendi að rífa það, sem þurfa þykir eftir skipun slökkviliðsstjóra. Skal hann ávallt vera með sín ákveðnu verkfæri á brunastaðnum og aðstoða björgunarflokkinn, eftir fyrirmælum slökkviliðsstjóra.
- Vatnsslönguflokkur skal sjá um, að allar slöngur og tilheyrandi áhöld komi á brunastaðinn og skal hann koma slöngunum þannig fyrir, að þægilegt sé að

176

17. okt.

slökkva eldinn. Síðan skal flokkurinn starfa sem bunustjórar, eftir fyrirmælum slökkviliðsstjóra.

- d. Dæluflokkur skal mæta við slökkvistöðina, svo fljótt sem unnt er, þegar eldsvoða ber að höndum, og hafa dæluna í góðu standi, flytja hana þangað sem slökkviliðsstjóri skipar fyrir, setja véldæluna í gang og láta hana dæla.

Björgunarflokkur, vatnsslönguflokkur og dæluflokkur skulu aðstoða hver annan eftir föngum við að koma brunatækjum fyrir á brunastað og ganga frá þeim að eldsvoða loknum.

- e. Brunaboðar skulu, þegar eldsvoða verður vart, gera slökkviliðinu aðvart svo fljótt sem þeim er unnt, á þann hátt, sem fyrirskipað er af brunamálanefnd. Ekki mega þeir tala við nokkurn mann, nema segja götu og hústölu, þar sem eldurinn er. Skulu þeir að afloknu brunakalli skyldir til að mæta á brunastaðnum og vinna þar það, sem slökkviliðsstjóri leggur fyrir þá. Loks skulu þeir skyldir til að tilkynna slökkviæfingar, eftir skipun slökkviliðsstjóra.

22. gr.

Allir liðsmenn skulu, ef þeir verða varir við að óvarlega er farið með eld, eða á annan hátt brotið á móti brunamála­reglugerð kaupstaðarins, vanda um við þá, sem gera sig seka í því, og ef þeir hlýða ekki aðvörun þeirra, gera slökkviliðsstjóra aðvart svo fljótt, sem unnt er.

23. gr.

Allir liðsmenn eru skyldir til þess að mæta á slökkvistöðinni þegar liðið er kallað saman, að undanskildum 2 mönnum úr björgunarflokki (sbr. 21. gr.), nema þeir séu þess fullvissir, að öll áhöld séu komin á brunastaðinn í notfæru ástandi.

Engin forföll eru tekin gild nema veikindi eða fjarvera úr lögsagnarumdæminu.

24. gr.

Allir slökkviliðsmenn eða aðrir þeir, sem vinna að slökkvitilraunum, æfingum eða björgun við eldsvoða, skulu slys­atryggðir á kostnað bæjarsjóðs. Verði slökkviliðsmaður fyrir slysi, skal fyrir allt að 10 daga greiða úr bæjarsjóði bætur eftir sömu reglum og slys­atryggingin greiðir eftir þann tíma.

IX. KAFLI

Sektarákvæði o. fl.

25. gr.

Með brot gegn reglugerð þessari skal fara sem opinber lögreglumál, og greiðir hinn seki 5—1000 kr. sekt fyrir afbrot sitt nema þyngri refsing liggji við að lögum. Sektin rennur í bæjarsjóð Seyðisfjarðarkaupstaðar.

26. gr.

Með reglugerð þessari er úr gildi felld reglugerð fyrir eldvarna- og slökkviliðið á Seyðisfirði frá 9. maí 1910.

Reglugerð þessi, sem bæjarstjórn Seyðisfjarðarkaupstaðar hefur samið og samþykkt, staðfestist hér með samkvæmt lögum nr. 85 22. nóvember 1907, til þess að öðlast gildi 1. nóvember 1941, og birtist til eftirbreytni öllum þeim, sem hlut eiga að máli.

Félagsmálaráðuneytið, 17. október 1941.

Stefán Jóh. Stefánsson.

Páll Pálmason.